

Bunamain 3000 musicantas e musicants

Cuira: 27. Festa da musica chantunala

DA GION NUTEGN STGIER / ANR

■ **La proxima fin d'emna è Cuira per trais dis èn il center da la musica. 76 furmaziuns da musica sa preschentan als experts ed a l'auditori. In punct culminant è segir il til da festa da la dumengia. Per l'organisaziun segna la Societad da musica Union.** Il 2007 ha la Festa da musica chantunala gù lieu a Scuol e quai cun ina participaziun da 63 furmaziuns da musica. Ussa sis onns pli tard s'entaupan musicantas e musicants da noss chantun a Cuira per la 27avla ediziun da la Festa da musica chantunala. La chapitala grischuna segna gia per la terza giada per l'organisaziun da l'occurrentza da musica. Da venderdi fin dumengia spetga Cuira bunamain 3000

musicantas e musicants che derivan da 76 societads da musica. Da quellas èn 45 furmaziuns grischunas e las autras 31 vegnan da tut las regiuns da la Svizra en nosa chapitala. Per l'entschatta da la Festa da musica chantunala 2013 envindan ils organisaturs venderdi saira ad ina occurrenza da gala en la halla da la citad. Tranter auter cumpiglia il program in concert da la furmaziun da famiglia «Oesch's die Dritten» ed il trio da l'Austria «Die Zillertaler Haderlumpen».

Trais zonas da silenzi

Cuira saja pront per retschaiver musicantas e musicants e da porscher a quels ina ospitalitad cordiala, ha ditg *Franz Tscholl*, il president dal comité d'organisaziun ier a chaschun dad ina conferenza

per las medias. La chapitala grischuna veglia porscher a las societads da musica ed al numerus auditori las megras cundiziuns da basa. A l'auditori stattan a disposiziun trais zonas da silenzi per udir las producziuns da musicantas e musicants. Quellas zonas da silenzi èn en il teater da la citad, en la sala «Titthof» ed en la sala da gimnastica «Montalin». En quels trais lieus vegnan mintgamai ils trais experts a gizzar las ureglias per lura valitar il toc da patg ed il toc da pensum.

Trais categorias

Sunà vegn en trais categorias e la pli gronda da quellas è cun 40 furmaziuns da musica quella da brass. 32 societads da musica sa concurrenzeschon en la categoria armonia e tschintg musicas in-

strumentalas sunan en la categoria fanfara. La valitaziun dals puncts va da 51 puncts fin 100 puncts tut tenor la prestaziun da las furmaziuns da musica. Per la valitaziun dals puncts quintan 11 criteris da las sis parts da valitaziun. Las 76 societads da musica èn repartidas sin quatter classas tenor fermezza e cun 30 musicas instrumentals è la 3. classa tenor fermezza la pli gronda. En la classa tenor fermezza 1 sunan sis furmaziuns da musica, en la classa tenor fermezza 2 èn quai 18 tocs ed en la 4. classa tenor fermezza èn da la partida 17 musicas instrumentals.

39 furmaziuns sa participeschon al til da festa

In punct culminant da la 27. Festa da

musica chantunala è segir il til da festa che ha lieu dumengia a las 13.30. Las 39 furmaziuns da musica che sa preschentan al public partan dal teater da la citad en direcziun halla da la citad, nua che l'act da festa ha lura lieu. Ina attracziun vegn segir er ad esser la concurrenza da marschar che ha lieu en la «Grabenstrasse». La concurrenza da marschar è tar ina festa da musica adina il magnet per attrair il public e che sveglia l'interess da vegl e giuven. Ina ulteriura culminaziun vegn bain er ad esser l'onurificaziun dals veterans. Undrads vegnan 42 veterans chantunals, 41 veterans federals, 21 veterans d'onur ed in veteran «CISM».

Dapli infurmaziuns da la festa sut l'adressa dad interent: www.chur2013.ch



Per trais dis stattan las musicas instrumentals en il center da la chapitala grischuna che segna per l'organisaziun da la 27. Festa da musica chantunala.



Ils trais commembers dal comité d'organisaziun èn prontos per la gronda festa: Jörg Gysin, schef musica, Franz Tscholl, president e Mario Jenal, vicepresidente (da san.).